



## Iimaanaa fi Barbaachisummaa Isaa

### Description

Kutaalee darban keessatti waa'ee iimaanaa fi Islaamaa ilaalle turre. Iimaana jechuun qalbiidhaan dhugaan amanuu fi wanta qalbiin amanan san dubbii fi hojiin dhugoomsudha. Fakkeenyaf namni "Rabbii olta'etti amanee jira" jedhu, Rabbii fi wantoota Rabbiin beeksisetti amanuu, wanta Rabbiin itti ajajee dubbachuu fi hojjachuu, akkasumas wanta irraa dhoowwe dhiisun isarraa eeggama. Yoo kana hojjate namni kuni iimaanaa qabaa jechuudha. Bal'innaan waa'ee iimaanaa hubachuuf kutaalee darban irraa dubbisuun gaarii ta'a. In sha Allah, har'a kan ilaallu barbaachisummaa iimaanati fi akkamitti qalbii keessatti hidda akka qabsiisanidha.

### Gaafiwyan Ilmi namaan kameeyuu deebii barbaadu

Jireenya keessatti gaafiwyan namni hunduu deebii quubsaa barbaadu maal akka ta'an beektu? Gaafiwyan kunniin: "**Eenyutu na uume? Maaliif addunyaa tana keessa jiraadhaa? Eessa deemaa jiraa? (du'aan booda maal ta'aa?)**" kan jedhaniidha.

Namoonni gariin gaafiwyan kanniin irraa garagaluun akkanumatti dhama'anii jiraatu. Muraasni isaanii immoo qorannoo fi qo'anno adda addaa adeemsisuun deebii sirrii argachuu hin dandeenye. Jireenya isaanii guutu dhama'anii jiraatu. Gariin isaanii immoo madda sirrii qo'achuun deebii gahaa argatanii jireenya gammachuu jiraatu.

Jireenya keessatti gammachuu fi tasgabbii dhugaa dhandhamuuf gaafiwyan kanaaf deebii sirrii argachuu dirqama ta'a. Gaafiwyan kanniniif deebii gahaa kan kenu iimaana akka ta'e shakkii wayitu hin qabu. Namni "Eenyutu na uume?" jedhe yommuu of gaafatu, ofiin of uumu akka hin dandeenye ykn namoonni isa uumuu akka hin dandeenye ni hubata. Kanaafu, Kaaliquni (Uuman) isa uume jiraachu akka qabu ni amana. Kuni gaafi jalqabaatiif deebii gahaa isaafta'a. Gaafin itti aanu gaafi jalqabaa irraa kan adda bahuu miti. "Maaliif addunyaa tana keessa jiraadhaa?" Kaaliquni samii, dachii fi wantoota isaan jiddu jiran taphaaf hin uumne. Kaayyoon jiraachu qaba. Ilma namaan akkanumatti kaayyoo malee hin uumu. Rabbiin (subhaanahu wa ta'aala) ilma namaan erga uumee fi wanta isa barbaachisu erga dhiyeesse fi qopheesefi booda, wanta tokko akka hojjatu ni ajaja ykn wanta tokkorraa ni dhoowwa. Kanaafu, **kaayyoon guddaan ilmi namaan jireenya tana keessatti uumameef wanta Rabbiin itti ajaje hojjachuu fi wanta Inni irraa dhoowwe dhiisun Rabbiif bitamuu fi gadi jechuu isaa dhugoomsudha**

. Gaafiiwan jalqabaa lamaan armaan olitiif haala kanaan Rabbiin deebii kenna:

يَأَيُّهَا النَّاسُ أَعْبُدُ وَأَرْبِكُمُ الَّذِي خَلَقَكُمْ وَالَّذِينَ مِنْ قَبْلِكُمْ  
لَعَلَّكُمْ تَتَفَقَّنَ ٦١

“Yaa namoota! Akka [Rabbiin] sodaattaniif jecha Gooftaa keessan kan isinii fi warra isiniin duraa uume qofa gabbaraa.” Suuratu Al-Baqara 2:21

Ammas dabalataan ni jedha:

“Jinnii fi ilma namaa akka Ana qofa gabbaraniif malee hin uumne.” Suurat Az-Zaariyat 51:56

**Ibaada (gabbarii)** jechuun Rabbiin jaallatanii fi olguddisanii (kabaja guddaan) Isaaf of gadi qabuu fi buluudha.

Namni tokkoakkana jechuun gaafi gaafachu danda'a, “Rabbiin gabbarri keenya irraa bu'aa ni argataa?” Deebiin kanaa gaafi armaan olii sadaffaa keessa jira. Innis, “Eessa deemaa jiraa? (du'aan booda maal ta'aa?)” Rabbin subhaanahu wa ta'aalaa gabbari (ibaadaa) keenya irraa bu'aa ykn faayda hin argatu. Inni wanta hundarrraa Of gahaa fi Dureessa (Ghaniyy) waan ta'eef. Kanaafu, faaydan ibaada namuma hojjate saniif deebi'a. Kanaan akka termii (jecha wali-galtee) Islaamatti “Jazaa” jennaan. Addunyaa tana keessatti wanta hojjataniif mindaa guutuu argachuun ni ulfaata. Kanaafu, Guyyaan mindaa guutu itti argatan jiraachu qaba. Kuni immoo kan adeemsifamu du'aan booda. Rabbiin Guddaan olta'e ni jedha:

كُلُّ نَفْسٍ ذَآيِقَةُ الْمَوْتِ وَإِنَّمَا تُؤْفَقُ بِأُجُورِكُمْ يَوْمَ  
الْقِيَامَةِ فَمَنْ رُحِزَّ عَنِ النَّارِ وَأَدْخَلَ الْجَنَّةَ فَقَدْ فَازَ وَمَا  
الْحَيَاةُ الدُّنْيَا إِلَّا مَتَعٌ الْفُرُورٌ ١٨٥

“Lubbuun hundi du'a ni dhandhamti. Mindaawan keessanis guutumaatti kan argattan Guyyaa Qiyaamati. Namni ibidda irraa fageeffamee Jannata seensifame, dhugumatti milkaa'eera. Jireenyi duniyaas meeshaa gowwoomsaa qofa.” (Suuratu Ali-Imraan 3:185)

Kanaafu, deebii gaafi “Eessa deemaa jira? (Du'aan booda maal ta'a?)” jedhuakkana ta'a: namni du'ee kan badu osoo hin ta'in lamu deebifame wanta hojjataa tureef ni gaafatama. Ergasii wanta hojjataa ture irratti hundaa'e, ni badhaafama ykn ni adabama. Wanta gaarii yoo hojjate Jannataan badhaafama, wanta badaa yoo hojjate immoo Jahannamiin adabama. Kanaafu, imaanni gaafiiwan sadan kanaaf deebii

quubsa fi gahaa ta'e kenna. Kuni barbaachisumma fi faayda iimaana isa guddaa ta'eedha.

### **Hojiwwan Gaggaarin Maal irra dhaabatuu?**

Namni gahuumsa isaa gahee badhaafamuuf ykn adabamuuf hundeen ykn bu'urri hojii isaa beekkamu qaba. Akkuma mukni hidda yoo hin qabaatin muka jedhamu hin dandeenye, hojiin gaarinis hundee (bu'uura) irratti ijaarramu yoo hin qabaatin hojii gaarii jedhamu hin danda'u. Namoonni baay'een "Kiristaanoni ykn yahuudonni ykn namoonni Islaamanala amanti biroo hordofan hojii gaarii baay'ee hojjatu. Akkamitti hojiin gaariin kuni jalaa badaa?" jechuun gaafatu. Deebiin kanaa salphaadha. Akkuma manni bu'uura yoo hin qabaatin ykn bu'urri isaa yoo murame diigamu, hojiin gaarin bu'uura hin qabnes akkasuma diigama ykn bada. Bu'urri hojii gaarii harkaana iimaanaati. Harkaana iimaana yommuu jennu **Rabbitti, Malaykoota Isaatti, kitaabban Isaatti, Ergamtoota Isaatti, Guyyaa Dhumaatti fi keyriis ta'e sharriis ta'e qadara (wanta murteefametti) amanuudha.** Kunniin qalbii keessa yoo hin jiraatin hojiin ni bada.

Gaafa tokko Umar ibn al-Khaxxaab gadaamaa molokseen keessa jiraatu biraan darbe. Akkana jechuun lallabe, "Yaa moloksee!" Ergasii Molokseen gadi bahe. Umar isa ilaale booye. Ni jedhame, "Yaa hogganaa warra amananii! maaltu si boochisaa?" Umaris ni jedhe, "Jecha Rabbii akkana jedhuun yaadadhe, "**Fuulli gariin Guyyaan san (Guyyaa Qiyaamaa) salphattuudha. Hojjattu, ifaajjudha. Ibidda gubduu ni seenu.**" (Suuratu al-Ghaashiyah 88:2-4) Kanatu na boochise" jedhe Umar.[\[1\]](#)

Molokseen kuni ni hojjata, ni ifaaja. Garuu ifaaaje isaatirraa firiin gaariin inni argatu hin jiru. Hojiin isaa iimaana sirrii irratti waan hin hundoofnef.

Rabbiin subhaanahu wa ta'aala nama hojii isaa iimaana irratti hundeesse fi nama hojii isaa iimaana irratti hin hundeessine haala kanaan fakkeenyan ifa godha:

**"Sila nama bu'uura ijaarsa isaa sodaa Rabbii irraa ta'ee fi Jaalala [Isaa] irratti bu'uressetu caala moo, nama bu'uura ijaarsa isaa afaan qilee kan cituu dhiyaate irratti bu'uresssee ergasii ibidda Jahannam keessatti isaan kufetu caalaa?"** Suuratu at-Tawbaa 9:109

Akkuma yeroo darbe jenne sodaan Rabbii fi jaalala Isaa barbaadun iimaana irraayyi. Kanaafu, namni iimaana irratti hojii ofii ijaare dhugumatti bu'uura cimaa irratti ijaare. Namni hojiin isaa iimaana irratti hin hundoofne immoo akka nama mana isaa afaan qilee cituuf dhiyaate irratti ijaareti.

Rabbiin subhaanahu wa ta'aala warroota hojii isaanii iimaana irratti hundeessan badhaasa guddaa kennaaf. Qur'aana keessatti,

**"Dhugumatti, isaan amananii fi hojii gaggaarii hojjatan, Jannanni Firdaws iddo simanna (qubannaa) isaaniif taatee jirti. Ishee keessa yeroo hunda jiraatu. Ishee irraa jijjiramuu hin barbaadan."** Suuratu al-Kahf 18:107-108

Warra hojiin isaanii iimanaa irratti hin hundoofne immoo hojiin isaanii akka jalaa badu ni beeksisa:

**"Jedhi "Sila warra hojiidhaan hundarra hoonga'oo ta'an (kasaaran) isiniif himnuu?" Isaan warra odoo dalagaa tolchinee hojjannaayaa yaadanuu addunyaa keessatti hojiin isaanii duraa**

**badeedha.**

**Isaan sun warra keeyyattoota Gooftaa isaaniitii fi wal-qunnamtii Isaatti kafaranii dalagaan isaanii jalaa baddeedha. Kanaafu, Guyyaa Qiyaamaa madaalaa isaaniif hin dhaabnu.”** Suuratu al-Kahf 18:103-105

Hojii iimaanaa irratti hundeessu jechuun Rabbittii fi harkaana iimanaa hafanitti amanuun hojii gaggeraaii iklaasan hojjachuudha.

Hojiin gaariin iimaanaa irratti hin hundoofne yommuu jennu immoo Rabbii fi harkaana iimanaa birootti kafaruu (kaadu ykn amanuu diduudha).

### Karaalee iimaanaa qalbii keessatti hidda qabsiisan

Wanta tokko dhugaa ta’uu isaa beekuf karaa adda addaatti fayyadamna. Isaan keessaa odefannoo nama dhugaa dubbatu irraa arganne, ijaan arguu, sammuin itti yaadu fi kkf. Fakkeenyaf, wanti tokko bakka fagoo nu hin arginetti yoo uumame, namni dhugaan gonkumaa soba hin dubbanne, “Wanti akkana uumame” jedhee yoo nutti hime, oduu isaa kana ni dhugoomsina. Akkasumas, yoo qaaman bira dhaqnee argine daran dhugaa ta’uu ni hubanna. Ammas, mallattoo oduu sanii arguun sammuin itti yaanne dhugaa ta’uu ni barra.

Wantoota dachii fi samii keessa jiran hunda ijaan arguu hin dandeenyu. Kanaafu, maloota armaan olii keessaa tokkoon ykn sani oliin fayyadamuu jiraachu wanta ijaan hin arginetti ni amanna. Yeroo baay’ee iimaanni wanta ija keenyan hin mul’anne amanuun kan wal qabateedha.

Kanaafu Karaalee Iimaana qalbii keessatti hidda qabsiisan bakka gurguddaa afuritti quodu dandeenyu. Isaanis:

**1.Sami’iyi (dhageetti)-** akkuma irrannatti jenne wanta ijaan hin argine karaan ittiin amannu keessaa tokko odefannoo dhugaa nama dhugaa irraa dhageefachuudha. Ergamtoonni Rabbii odefannoo dhugaa waa’ee geybii (wanta ijaan hin mul’annee) ilaachise Rabbiin irraa gara ilma namaa geessanii jiru. Kanaafu, namni wanta isaan jedhanitti amanee fi hordofe, nageenyi fi milkaa’inni isaf ta’a. Qur’aanni ergaa dhumaa Rabbiin irraa gara ilma namaatti bu’eedha. Waa’ee geeybi ilaachise odefannoo dhugaa gonkumaa sobni itti hin seenne of keessaa qaba.

لَا يَأْنِيهُ الْبَطْلُ مِنْ بَيْنِ يَدَيْهِ وَلَا مِنْ خَلْفِهِ تَزِيلُ مِنْ حَكِيمٍ



**“Sobni fuundura isaatiis ta’ee duuba isaatiin itti hin dhufu. Rabbii Ogeessa Faarfamaa ta’e irraa buufame.”** Suuratu Fussilat 41:42

Qur’aanatti duraa duuban sobni wanti jedhamu itti hin dhufu. Kana jechuun beekumsa namaaf dhiyeessu keessatti sobni itti hin dhufu. Seerotaa fi murtoowwan kaa’ee keessatti sobni itti hin dhufu. Seenaa durii irraa wanta beeksisu keessatti sobni wanti jedhamu itti hin dhufu. Wanta gara fuunduraatti uumamu irraa

odeefannoona Qur'aanni beeksisu hundii dhugaadha. Sobni wanta jedhamu itti hin dhufu. Sababni isaas Qur'aanni Rabbii waan hundaa beeku irraa waan bu'eefi.

**2.Hissiyy (miirawaa ykn wanta ijaan argan)**– mallattoo dachii fi samii keessa jiran ilaalan iimaanni qalbii keessatti hidda akka qabatu gargaara. Fakkeenyaf, dachii, samii fi wantoota isaan jiddu jiran yommuu ilaalan Khaaliqni akka jiruu fi Tokkicha fakkaataa hin qabne akka ta'e ni hubatan. Qur'aana keessatti:

**“Sila gara samii gubbaa isaanii jirtu, tan uraa homaatu hin qabne, akkamitti akka ishee ijaarre fi miidhagsinee hin ilaalle? Dachii diriirsinee gaarren dhaabbatoo ishee keessatti gadi suuqne; akaaku biqiltoota babbareedoo hunda irraa ishee keessatti magarsine. Gabricha tawbatuuf hubannaa fi gorsa akka ta'uuf [kana goone].”** Suura Qaaf:6-8

**3.Aqliyy (sammuun)**– kuni wanta dhagayanii fi ijaan argan sammuun itti yaadun dhugaa shakkii hin qabne (yaqiina) irra gahuudha. Yommuu Qur'aana fi wantoota Rabbiin uume irratti xinxallinu iimaanni keenya qalbii keessatti hidda qabata.

**4.Fixriyy (uumaman)**– kuni immoo uumaman wanta nu keessa jiruudha. Namni hanga fedhe yoo kafareyyuu uumamni isaa gara Rabbitti ni akeeka. Namni garmalee yeroo rakkatu, “Yaa Rabbi! Yaa Gooftaa kiyya!” jechuun iyya. Fakkeenyaf, Fira'awni ummata isaatin, “Ani gooftaa ol'aanaa keessani” jechaani türe. Garuu yommuu bishaanin nyaatamuakkana jedhe, “**Dhugumatti Kan ilmaan israa'iil itti amanan malee haqaan gabbaramaan biraakka hin jirre amaneera. Ani Musliimota irraayi**” (Suuratu Yuunus 10:90) Yommuu rakkoon keessa isaa dhooftu haqaan gabbaramaan Rabbiin malee akka hin jirre ni amane.

Kitaabban wabii

[1] Tafsiir ibn Kasiir 8/385 daaru Xaybaa

[2] al-aqidatul Islaamiyyatu wa ususuhaa By Abdurahmaan Hasan Madiniyyi, fuula 49-50

[3] Sharih Aqidatil xahaawiyah fuula 48

#### Date Created

June 13, 2018

#### Author

admin